

證治精辨

症治精辨

醫藥學報社同人撰

同社吉生裘慶元輯

時疫霍亂寒熱辨（附簡明療法）

曹炳章

今歲己未太陰濕土司天陽明燥金在泉天令春寒夏涼淫雨連天秋後忽寒忽熱以致濕遏熱伏苟是時天氣正熱則出從熱化而爲暑溼伏暑今因天令應熱反寒則內伏之熱欲化從外出而不得更加客寒外束兩邪交訐其病乃發輕則發爲暑溫如心胸發熱手足冰冷泛泛欲吐脉沉數舌邊尖紅中白滑重則卒然清濁混淆腸胃乃亂而爲霍亂氣道立時閉塞血絡因而瘀滯甚則肢冷脉伏目陷音嘶汗淋色瘀立現陽微欲脫之險象非氣血卒然枯槁實氣不流行血肉凝阻而死故初起

亟宜開閉通竅俾氣通血活邪得外泄則正自復昧者不知邪閉血凝熱深厥深之理見其肢冷脉伏卽以爲寒又疑爲脫然據現狀治驗詳細辨之而熱症十居七八寒症十僅二三苟能認症的權用藥精當治不失時食守禁忌本無死症無如近世醫家多不明寒熱真假動手桂附回陽薑萸止嘔任意亂投因此傷生者比比皆是一時好行其德者復以十滴水呀囉巔之類博施濟衆而不識其藥性之偏於熱苟用於真寒者果能回生若誤用於熱症卒至不救死者之冤無從呼籲嗚呼此所謂好仁不好學者其間功與過相去爲何如哉炳章有見於斯茲就時疫霍亂之屬寒屬熱從臨證之實驗分條辨析如下俾醫家審證用藥病家知所從違皆有標準庶幾藥不亂投命不夭枉耳

(一)舌苔 凡舌苔白燥黃燥或舌中雖白膩邊尖紅赤者甚則乾黑而糙皆爲熱症若舌苔白滑而潤或灰黑而滑或灰黃兼白滑皆爲寒爲濕

(二)唇口 凡唇紅及唇乾燥者爲熱唇白及唇潤澤者爲寒口燥渴喜多飲甚有急求涼水及口氣熱者皆爲熱口雖燥而不喜多飲及口氣冷者皆爲寒

(三)眼目 若目眶陷而目眦反赤者爲熱目眶黑陷目眦不赤者爲寒

(四)肢體 凡肢體冷而欲揭去衣被者爲熱若肢體冷而自引衣被蓋覆者爲寒

(五)胸脘 凡心煩脘悶者爲熱心煩脘不悶者爲寒

(六)嘔吐 凡嘔酸濁食物苦水者爲濕爲食爲熱若嘔清白水者爲寒

(七)腹痛 凡腹痛乍緊乍緩者爲熱腹痛綿綿不輟者爲寒

(八)轉筋 凡轉筋攣而痛者爲熱若轉筋止收引者爲寒

(九)下利 凡肛熱如火瀉下臭穢如黃水者爲熱若肛門不熱下利澄澈如水者

爲寒

(十)小便 凡小便短赤甚則涓滴不通者爲熱小便清淡而長者爲寒

試觀現行之霍亂其舌多紅或苔黃燥皆口渴引飲肛門熱吐利皆臭穢小便多不通種種病狀多是內真熱而外假寒雖有肢冷脈伏似寒象卽所謂熱深厥亦深是也至於肢冷脈伏手足抽搐或麻木嘔吐呃逆音嘶自汗等狀寒症熱症俱有最易迷惑苟能細心推究自易鑑別姚梓欽云霍亂脈沉緊爲寒沉數爲熱至於寒極時細澀熱伏亦細澀寒症細澀多因汗吐下而致脫熱症細澀或得汗吐下而稍通非合病狀體質一一參考鮮有不誤者也

又有乾霍亂亦有寒熱之別如初起不吐不瀉胸腹絞痛手足抽搐或手指麻木或悶閉無汗或汗出淋漓甚則肢冷脈伏辨症當以驗舌察現症爲主若舌苔灰黑或白滑皆爲寒乾黑而起絳刺者爲熱小便赤熱而澀爲熱小便清冷自遺爲寒拒溫按爲熱喜溫按爲寒張禾芬云乾霍亂乃觸冒毒穢經隧血瘀但有熱瘀寒瘀之分必須先用刮法刮後其所現紅紫青黑之色便可認定寒熱輕重惟太乙紫金丹腹

痛時研服一顆則絞痛卽瘥或再用食鹽一錢放刀上火炙透化水服若得吐下氣通自愈切勿先服生薑十滴水等熱藥苟誤服之必死無疑

霍亂證狀既有寒熱之分治法亦當分別治寒症當以溫經回陽治熱症當以苦降堅陰此內服法也若熱霍亂初起心中不暢不吐不瀉必須引吐引瀉使其熱毒一出中脘卽鬆中脘鬆則四肢必溫如外治則取嚏以開其肺氣吐則開其胃氣下則開其脾氣挑刮開其皮毛經絡之氣痧藥開其臟腑之氣總取其通以泄其熱氣惟熨搗摩擦之外治各法無論寒熱尙可通用如熱霍亂轉筋者用燒酒四兩加樟腦五錢令人用力摩擦其轉戾堅硬之處擦一時許導引其伏熱達四肢而筋結始軟再以鹽酒浸之以杜熱邪復熾始不致轉戾矣 又法熱霍亂四肢厥冷者用吳茱萸一兩研細末和鹽酒調塗兩手足心以導引內熱達四肢 或以吳茱萸食鹽各數兩炒熱布包熨搗臍下亦妙 或用生薑二兩葱頭二兩生蘿蔔四兩同搗爛如

泥炒熱用布包紮熨運肚腹如冷再炒再運俟手足轉溫爲度以上外治各法寒症亦可通用 治寒霍亂內服以霍亂定中酒爲最效肢冷轉筋以樟腦精酒摩擦至手足溫爲度如厥冷已久胃氣漸敗再用急救雷公散一二分納入肚臍內用生薑一片蓋藥上再用艾火灸之一面接服溫經通陽之劑以助元氣（定中酒樟腦精酒雷公散紹城大街和濟藥局有購）

霍亂普通方 治霍亂舌白胸中泛泛周身不暢欲吐不吐欲瀉不瀉乘其尙未吐瀉卽服此方使重者轉輕輕者卽愈

鮮藿香 錢半

新會皮 錢半

赤茯苓 錢半

半夏 錢半（竹瀝製）白蔻末 七分（沖）

淡竹茹 二錢

廣鬱金 二錢

滑石 三錢 鮮荷葉包

用陰陽水煎微冷服

霍亂初起方 治霍亂初起舌白上吐下瀉脘悶腹痛寒熱口不渴者卽服此方

杜藿香 錢半

製川樸 錢半

製半夏 二錢

飛滑石

三錢用葉荷包煎白蔻仁 八分(冲)

川連 六分(薑炒)

炒黃芩 二錢

淡豆豉 錢半

紫金片 五分(研冲)

陰陽水煎服

熱霍亂初起方

治熱霍亂舌灰膩或舌中薄白邊尖紅嘔吐酸腐心胸煥熱小便

短赤肛門熱下利黃臭糞水口渴引飲脈沉數或弦數者此方主之

淡豆豉 二錢

焦山梔 三錢

炒黃芩 二錢

葛根 錢半

竹茹 二錢(薑炒) 杜藿香 錢半

飛滑石 三錢(荷葉包)扁豆衣 錢半

右加飛龍奪命丹一分分冲服另用左金丸一錢五分服藥後陰陽水送下

寒霍亂初起方 治寒霍亂嘔吐清水瀉下亦清水自汗肢冷喜飲熱湯脈細舌白者卽用此方

吳茱萸 六分

川 連 八分(拌炒)

川桂枝 錢半

淡乾薑 八分

浙茯苓 三錢

焦白朮 二錢

炒白芍 三錢

新會皮 一錢

右加霍亂定中酒一瓶(三分)沖入陰陽水煎冷服

上列四方爲時疫霍亂初起時不及請醫診治可將各方對症選服不拘寒熱霍亂見有吐瀉者藥湯皆宜冷服若轉筋者加鮮勒人籐一兩宣木瓜一錢五分同煎服更佳

痧疹癰痞喉及治法論

楊燧熙

由春至今鄙人所診斷痧症癰症檢日記簿中比他症恒多不但幼孩成人亦有之

每兼咽喉紅腫者較重夾咽白者爲尤重推原其故病機十九條而火居其五熱居其四可見諸病火熱爲多蓋風寒暑濕皆能化火天地萬物皆賴此火爲生發之本若無此火則天地幾乎息矣莊子謂火傳不知其盡而釋氏相宗亦以煖與識並舉也但平則爲恩亢則爲害生殺之機互相倚伏人事百物皆然故火能生人而亦能殺人也現輪軌之交通電光之燦爛食品之需煤烟酒之慣性人事之倥傯名利之競爭眞元之內守在古人之下火與熱居其四五之數在古人之上也且道途中之穢濁氣住室中之不潔空氣微生物之飛揚黴菌之傳播水料之不潔洋碱之常嘗（市井之麵食概以洋碱奸商爭用洋碱性劣價廉用量少口碱性優價昂用量多致易罹喉痧之一大原因也燧於上海神州醫報二十外期中登有易罹喉症說略詳原因茲不再贅）夫體質熱者陰每失守感則卽病風陽由口鼻吸入痰火鬱於胸中則頭疼發熱頸腫生核氣急痰嘶腑氣不通小洩赤少遍身紅點咽關紅腫或

白腐頰車拘急納飲爲艱甚則胸高肢冷音嗄神迷呃忒脈數大或細小或弦滑苔黃厚有硃點或白有孔外或壯熱或不熱入裡神糊滿腹拒按已形內傳夫一陰一陽結爲之喉痺一陰者手少陰君火心之脈也一陽者手少陽相火三焦之脈也二經之脈並於喉絡於咽喉者一身之總要百節之關頭喉之於人蓋其重矣胡可令其受病哉顧病之由起於不遵衛生者也故氣熱則內結結甚則腫脹脹甚則痺痺甚則不通而死矣良由氣不轉化痰得內居邪勢由上至中及下由表逆傳陰無涵養之權陽有升騰之勢邪乘虛襲虛不制邪此壯火食氣亢則害也擬留得一分陰氣便有一線生機經以風淫於內治以辛涼佐以苦甘再以辛散熱淫於內治以鹹寒（倘咽淡白不紅苔脈反此當另求他法）故大要曰謹守病機各司其屬有者求之無者求之盛者責之虛者責之熱者寒之寒者熱之客者除之疏其氣血令其調達方雖未出法已顯然俾肺展氣行邪化痰消痧疹透而腫痛蠲矣甚則伏熱

深者繼見痲瘡或並見是邪由外入仍由外出誠於中者而形於外也然必痲紅瘡亮有光澤者方爲佳兆否則難有和平之望斯症原因甚夥殊形異類治法多端不拘乎此見證似同寒熱各異稍或孟浪生死立判千里毫厘可不詳爲辨哉甲曰可由運氣推之乙曰以謂不可盡信不可不信何也天之氣候不齊地之南北各別人之體質有殊或可以之備參云耳更有先寒而後化熱先熱而後轉寒或寒熱複雜者或下寒上熱伏熱溫邪熱入營分不在此例總宜刻刻留心處處着意審之以詳愼應之以活潑鄙陋臆見未識當否務乞同志共爲研究正其謬訛補其闕略以臻完善使於危急之際有所遵循則鄙人幸甚病者幸甚

時症研究談

皖巢湯雨霖

嗚呼噫嘻吾悲夫疫毒之中人何其速也大則數邑同時而起小則一鎮一村延門闔戶病症相似或一方而此沒彼起一處驚傳千門競惕遭斯慘者真有全家喪盡

哭哀之聲達於途聞者莫不爲之痛心敝邑自六月中旬卽發生時疫傳染甚速至今兩月來疫症尙未平復西醫某君至敝邑設防疫所凡罹此症者至該所診治十居八九獲其效者百無一二專施一種藥水打以嗎啡針別無他法使一時之效驗逾一二句鐘則病復如故竊笑吾邑之一般愚民喜新厭故揚西抑中爲該西醫之極力提倡皆係伊某之至戚據外方面傳云開辦月餘以來未見成效今至中醫處診治者亦屬多數目下該局亦冷落矣惟疫症仍然敝醫會特於上月初一日開會研究時疫方法並佈告病狀特錄於下尙祈海內諸道長公同而研究之

敝邑現今時疫流行傳染甚速投藥稍遲每多無救鄙人等忝居醫界目覩心傷是以招集同人研究方法以冀挽回天命急救同胞是症現狀吐瀉交作冷汗四肢厥逆心中煩躁口渴溺赤神昏目吊四肢麻木係暑濕互蘊滯其升降之機清濁相干而成霍亂之症間有轉筋抽搐者乃肝陰素虧熱燥筋急也考五運六氣歲至己未

太陰濕土司天太陽寒水在泉自大暑至秋分又係濕土主政濕淫於內而從熱化常有陰逆陽伏火極似水之象而口渴溺赤便臭是暑熱內伏之真諦不可掩也從此分界寒熱立判矣但街衢所貼託名天師救疫方用半夏蒼朮麻黃陳皮黨參等皆係香燥表散太甚恐致大汗亡陽慎勿妄服

公同研究時疫方法列後

廣藿香 錢半

宣木瓜 二錢

淡豆豉 錢半

粉甘草 一錢

金銀花 二錢

雲茯苓 三錢

佩蘭葉 二錢

扁豆衣 三錢

全當歸 錢半

黑料豆 二錢

貫仲 二錢

黃土 一團

初得此症時先服飛龍奪命丹行軍散八寶紅靈丹擇其一二而服之如神識昏迷加石菖蒲汁一匙痰響喉間加羅蔔汁一匙須扶起灌之切切不可放倒

本會並備製丸散隨時奉贈

預防時疫方

銀花 二錢

粉草 一錢

赤小豆 二錢

杭菊 二錢

桑葉 五片

藿香葉 錢半

蘆根 三錢（活水者）

右方以水煎服

預防時疫法

貫仲 一個

赤小豆 四兩

雄精 三兩

錦紋軍 三錢

右藥以夏布袋裝之置於水缸中三五日一換可以防疫

以上係吾皖巢一隅之地而發生時疫症但吾巢地土高燥敝會所研究之法不過如上所述他處之時疫同與不同不得而知也

節錄周徵之先生瘟疫脈沉說

俞鑒泉

近日時疫之病有所謂喉痧者初起脈俱沉細三部以兩尺爲甚兩尺又以左手爲甚其初至數尙清應指有力一二日後漸見躁疾模糊伏匿按之卽散舊謂瘟疫邪從中道起於陽明其脈右大於左竊謂此乃熱濁毒氣薰蒸肺胃脈形必是緩長洪大渾渾不清氣濁而中焦濕熱也近時病情乃邪伏少陰或冬暖不寒陽氣不潛陰精消散或膏粱無節脾胃濕熱下流克傷腎水或房室無度陰精下奪至春陽氣欲升陰精不能載陽上達故虛陽之已升者中道而止於咽喉不能達於大表其毒氣未全升者下陷於腎中薰灼燔蒸陰盡而死所謂逆冬氣則少陰不藏腎氣獨沉也治法嘗擬用豬膚湯麻辛附子湯二方並用減麻黃附子改用生者并重加黨參以達其毒毒散陰可存矣世每泥於喉症發於肺胃之成法用苦寒清降以清肺胃故熱毒愈無由達也張石頑曰傷寒以尺寸俱沉爲少陰少陰一經死症最多爲其邪

氣深入正氣無由自振也若夫春夏溫病熱病而見沉小微弱短澀者此伏熱之毒滯於少陰不能撐出陽分所以身大熱是不熱者皆不可救也惟沉而實見陽明腑實症者急以承氣下之不可拘於陽症陰脈例也凡時行疫癘而見沉脈均爲毒邪內陷設無下症萬無生理此論可謂詳矣至謂脈沉無下症必死者爲其不可下也下之亦必死然則於萬死之中而求其一生宜何道之從曰不從下奪而從上提重填其陰以舉其陽庶有幾乎何者此人金水并虛木火并實實者散之虛者滋之金復則自上而絜之水復則自下而托之如此而不生可告無罪矣下略

上說見建德周澂之先生讀醫隨筆中其標題爲冬傷於寒春必病溫冬不藏精春必病溫冬不按蹻春不病溫義不同說其論瘟疫脈沉一則與有關係其全書能曲暢經旨透達病情鄙人愛閱其書故連錄及之

霍亂病

天津敬慎醫室丁子良稿